

Date – 09/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Mizoram State Commission for Women (MSCW) chairperson Pi C. Lalchhandami chu a bang.
2. Mizoram Police leh Excise and Narcotics department-te'n kumin thla 8 chhunga heroin an man belh khawm chu kg 93 leh gram 105 a tling.
3. Prime Minister Narendra Modia chuan vawiin hian New Delhi-ah Abu Dhabi Crown Prince a kawm dawn.
4. Ramchhungah Mpox vei nia rinhlelh mi pakhat hmuhchhuah a ni.

<><><>

MSCW CHAIRPERSON

Eptu MNF leh zirlai pawlte'n bang tura an nawr Mizoram State Commission for Women (MSCW) chairperson Pi C. Lalchhandami chuan banna a thehlut.

Social Welfare, Tribal Affairs, Women & Child Development Secretary hnenah Pi C. Lalchhandami hian Inrinni tlai khan a banna lehkha hi a thehlut a. A banna lehkha-ah chuan MSCW a chairperson atana ruat a nih chungchangah eptu political party-te atanga beihna nasa tak a tawh thu a tarlang a. He dinhmun hi kum 65 tlin thlenga chelh theih a nih avangin a kum dik tak ang chuan he dinhmun hi la chelh zui zel thei tur la niin a insawi a. Chutiang a nih rualin hetiang boruak karah chuan chak tak leh tha tak, phur taka hnathawh zui a harsa dawna a hriat thu a sawi a. A awmna ZPM party hruaitute a biak rawn hnu-ah hetiang party inchirthehna tha lo tak awm zui tur hi tha a tih loh avang leh Women Commission zahawmna vawnhim na'n chairperson a nihna atanga banna a thehluh tak thu a sawi a ni.

Kumin March ni 8 a MSCW chairperson atana ruat Pi C. Lalchhandami hian he hna a chelh chhung hian thubuai 102 an ngaihtuah hman thu leh za zela 80 an chinfel hman thu a banna lehkha-ah hian a tarlang a. A awm hma kum 5 chhung, kum 2019 atanga February 2024 inkar chhung khan thubuai 86 ngaihtuah hman a nih thu sawiin he dinhmun a chelh chhung hian hmasawmna nasa tak an nei a a hriat thu a sawi bawh a ni.

MNF party chuan MSCW chairperson atana Pi C. Lalchhandami ruat a nih danah a kum chungchangah dan bawhchhiatna a awm niin an puh a. Vawiin tlailam dar 5 emaw a aia hma emaw a a ban loh chuan bang tura na zawka nawr an tum thu an lo sawi tawh a. Mizoram State Commission for Women Act, 2004 behchhan rules-ah kum 65 tling tawh chu Chairperson atan ruat theih a nih loh thu chiang taka a tarlan laiin sawrkar document hrang hrang leh Kohhran thil chhinchhiaha-ah te Pi Lalchhandami hian Chairperson atana ruat a nih hian kum 68-na a hmang mek tawh

tih chiang takin a lang a ni an ti a. Kum 2016 khan kum 60 a tlin tawh avangin sorkar hna atangin a chawl niin an sawi a. A bapstima certificate-ah pawh kum March ni 30, 1956 a piang a nih thu a inziak niin an sawi bawh a. Vawiin tlai a a ban loh chuan na zawka nawr an tum thu an lo sawi tawh a ni.



STATE FINANCES AUDIT

Kum 2021-22 tangka kum chhunga Mizoram leibat tlingkhawm cheng vaibelchhe 10,570 leh nuai 93 chu kum 2022-23 khan cheng vaibelchhe 10,972 leh nuai 49 in a pung chho.

Mizoram Principal Accountant General in kum 2022-2023 chhunga Mizoram sum dinhmun an endikna atanga an hmuhchhuah, tun hnai a thuchhuah an siam dan chuan Mizoram leiba hi a pung zawngin a kal a. Kum 2022-23 chhunga Mizoram sum thawhchhuah atanga chhuta za zela 3 point 37 chu sum indaih lohna a ni a. Sum thawhchhuah atanga chhuta leiba awm zat hi za zela 33 point 42 zet a nih avangin Mizoram Fiscal responsibility and Budget Management (MZFRBM) Act danin a phut chu a pha thei lo a ni. Hemi hun chhung vek hian hmasawna hna 291 zet thawhna atana cheng vaibelchhe 2,552 leh nuai 59 hmang chungin hna hi department hrang hrangin an thawk zo thei lova. Hemi avang hian hmasawna hna thawhte hi hman tangkai a ni thei lova. Zawh hun tur bituk anga thawh zawh loh hi kum 1 atanga kum 5 zet te a ni hlawm a. PHE, Power leh PWD-in hna an thawh zawh loh avanga sum sen belh ringawt pawh cheng vaibelchhe 87 leh nuai 19 a tling a ni.

Kum 2022-23 tangka kum chhung khan chhiat rupna thleng thin pualin sorkar laipui atangin State Disaster Response Fund (SDRF) hnuaiah Mizoram sorkar chuan cheng vaibelchhe 39 leh nuai 20 a dawng a, Mizoram sorkarin a do let vena tur chu cheng vaibelchhe 4 leh nuai 36 a ni a. Mahse, heta sum ruahman a vaiin cheng vaibelchhe 43 leh nuai 56 hi SDRF-ah Mizoram sorkar chuan a chhunglut ta lo.

Mizoram sum thawhchhuah punna hi kum 2022-23 khan za zela 17 point 99 in a pung a. Chutih lai chuan agriculture lama punna hi kum 2018-19 a za zela 12 point 35 a nih laiin kum 2022-23 ah chuan za zela 6 point 89 ah a tla thla thung a, industry lam pawh pung lovin a tlahniam a ni. Mizoram sum dinhmuna thil lawmawm lam ve thung erawh chu state-in a thawhchhuah ve State's Own Tax Revenue hi cheng vaibelchhe 247 leh nuai 88 a ni a, kum hmasa lam aia a punna hi za zela 29 point 2 zet a ni a. Non-Tax revenue pheih chu cheng vaibelchhe 405 leh nuai 65 niin kum hmasa aiin za zela 65 point 20 zet in a pung a ni.

Kum 2022-23-ah khan hmasawna lam atana hman tur ni lo, sorkar inrelbawlna leh hlawh ilo atana sum hman kha cheng vaibelchhe 10,092 leh nuai 39 zet a ni a. Budget a sum ruahman zawng zawng cheng vaibelchhe 11,416 leh nuai 22 atanga chhutin za zela 88 point 40 bial zet a ni a. Hmasawna hna thawhna atana sum ruahman chu za zela 11 point 6 chauh a ni.

Kum 2023 March ni 31 khan Mizoram sorkara Drawing and Disbursing Officer (DDO) 1,170 zinga 273-te chuan Savings leh Current Bank account-ah cheng vaibelchhe 262 leh nuai 56 zet an lo dah tih hmuhchhuah a ni bawk.

<><><>

DRUG SEIZURES

Mizoram Police leh Excise and Narcotics department-te'n kumin thla 8 chhunga heroin an man belh khawm chu kg 93 leh gram 105 zet a tling.

Police leh excise & narcotics hotute hnen atanga thudawn danin hemi chhung vek hian methamphetamine kg. 409 leh gram 425 an man bawk a, Ganja kg. 732 leh gram 18 an man bawk a ni. January leh August thla inkar chhunga Police bikin heroin an man chu kg 59 leh gram 250 niin a hlutna hi cheng vaibelchhe 17 leh nuai 77 chuang hu niin an chhut a. Hemi hun chhunga methamphetamine kg 285 leh gram 99 an man chu cheng vaibelchhe 37 leh nuai 18 thelh hu a ni a. Crystal meth kg 35 leh gram 155 manin a hlut zawng hi cheng vaibelchhe 105 leh nuai 46 chuang hu a chhut a ni. Ganja kg 294 leh gram 763 man bawkin cheng nuai 14 chuang hu a chhut a ni. Hemi chhung hian Police-te hian heroin chungchangah thubuai 227 ziak lutin mi 304 an man a. Methamphetamine kaihhnawihah thubuai 16 ziaklutin mi 24 an man a. Crystal meth kaihhnawihah thubuai 4 ziaklutin mi 3 an man bawk a ni.

Hemi hun chhung vek hian excise & narcotics department chuan heroin kg 33 leh gram 855 an man a, methamphetamine kg 122 leh gram 435 an man bakah Ganja kg 437 leh gram 255 an man bawk a. Kumin chhung hian crystal meth man an la nei lova, an ruihhlo man hlut zawng an tarlang ve lo bawk.

Kuhva ro tawlh chungchang CBI-in an chhui avangin July ni 25 atang khan Customs official-te chuan ramri a insumdawn tawna tun thlengin an la titawp a, chuti chung chuan Police leh excise and narcotics hnathawkte hian ruihhlo an la man reng a. Kum 2021 February ni 1-a sipai-in Myanmar a sorkarna an hnehchhuh atang khan Mizorama ruihhlo tawlh luh hi a hluar zual a. Hei hi Myanmar ram, a bik takin Mizoram dep Chin state a sorkar inrelbawl na tha a awm loh vang niin thuneitute chuan an ngai a ni.

<><><>

DENGUE

Kumin January atanga August thla tawp thleng, thla 8 chhung khan Mizoramah Dengue natna vei hmuhchhuah 369 an awm a, an zinga pakhatin nunna a chan.

Health & Family Welfare department hotute hnen atanga thu dawn danin thla 8 kal ta chhung khan Dengue vei ni a inhria mi 5,736 te thisen lak khawm a endik a ni a, mi 369-te chuan Dengue an vei tih hmuhchhuah a ni a, Aizawl district ami pakhatin nunna a chan pah tih chhinchhiah a ni. Dengue natna hri kai hi Aizawl district-ah tam berin mi 217 an awm a, Lunglei district-in dawtin mi 131 an awm a, district dangah chuan sawi tham an awm lo a ni. State dang ami lokal inringhlel mi 27 thisen an endik zingah Dengue hri kai hmuhchhuah an awm lo bawk. Kum 2019 atanga tun thleng hian Mizoramah Dengue natna avanga nunna chan hi 8 an awm tawh a, an vai hian Aizawl district ami vek an ni.

Kum 2022 khan Dengue avang hian Mizoramah mi 5 an ti a, nikumah 2 thih belh leh in kuminah 1 a thi leh a ni. Nikum kha Dengue vei hmuh chhuah tam ber kum a ni a, sample 12,949 endik zinga mi 2,060 te chuan Dengue an vei tih hmuhchhuah a ni.

<><><>

ASF UPDATE

African Swine Fever (ASF) vawk pulhri avanga kumin chhunga vawk thi zat chuan 12,000 a pel ta.

Animal husbandry and veterinary department hotute hnen atanga thudawn danin nimin khan ASF vawk pulhri avangin district 3-ah vawk 30 a thi a, Aizawl district-ah vawk thi a awm lo. Heti hian kumin February ni 9-a Champhai district Leithum khua a vawk pulhri avanga vawk thi hmuhchhuah leh a nih atang khan ASF avanga vawk thi zat chu 12,116 a tling ta a. Tun dinhmunah khaw 229 chu ASF vawk pulhri lenna khua a puan mek a ni. Niminah khan district 3-ah tho vawk 45 suat a ni a, hemi tiam hian kumina vawk pulhri darh zel tur venna atana vawk suat zat chu 20,814 a tling tawh baw k a ni.

<><><>

PM

Prime Minister Narendra Modia chuan vawiin hian New Delhi-ah Abu Dhabi Crown Prince, Sheikh Khaled bin Mohamed bin Zayed Al Nahyan a kawm dawn. Hruaitu pahnihte hian India leh UAE inkara thil pawimawh tam tak an sawi dun dawn a ni.

Sheikh Khaled hian nizan khan New Delhi a lo thleng a. Tun tum hi Crown Prince anih hnua a lo zin hmasak ber a ni a. UAE sawrkara minister leh sumdawng aiawhten an rawn tawiawm a ni. Naktuk hian Mumbai a pan leh nghal dawn a. Sumdawna chungchang sawihonaah a tel dawn a ni.

<><><>

MPOX

Ramchhungah Mpox vei nia rinhlelh mi pakhat hmuhchhuah a ni. Union Health Ministry sawidanin Mpox vei nia rinhlelh hi tunhnaia Mpox hrilenna ram atanga rawn zin haw a ni a. Damdawiinah khung hran nghal a ni a, test hrang hrang tih niin Mpox a vei leh vei loh finfiah tuma hmalak mek a ni.

Damlo dinhmun a tha a. Sawrkarin inkaihhraina leh tihdan tur a duan angin hmalak niin amah lo hnaihtute chhui nghal an ni.

Union Health Ministry chuan he hrileng lo hmachhawn tur hian ruahmanna tha tak an siam tih sawiin rampawn atanga lo zin haw te uluk taka an dinhmun lo endik anih thu a sawi a ni.

<><><>

NIGERIA

Nigeria-a khawnvartui phur tanker puakah mi 48 an thi. Vanduaina hi Niger khawpuia thleng niin kawngpui lunlaih tanker hi a puak a. Bida-Agaie-Lapai highway-ah tanker hi bawng phur truck nen an insu a. Lirthei dang pahnih pawh an kang tel nia thudawn a ni a. Mi 48 an thih bakah hian bawng 50 chuang an kanghlum baw k a. Ruang lakchhuah hna hi ngawrh taka kalpui nghal a ni.